

集一切福德三昧經卷上

化八

姚秦三藏法師鳩摩羅什譯

如是我聞一時佛在毗耶離菴羅樹園大法
講堂與大比丘眾十千人俱皆阿羅漢諸漏
已盡無復煩惱心得自在心得好解脫慧得
好解脫其心調柔如大龍王所作已辦捨離
重擔逮得已利盡諸有結到於彼岸菩薩摩
訶薩二萬人俱皆不退轉得陀羅尼及無礙
辯獲大神通善能出生諸深三昧念慧堅誓
智慧方便到於彼岸其名曰行志菩薩摩訶

薩師子志菩薩摩訶薩妙色志菩薩摩訶薩
增法志菩薩摩訶薩增長志菩薩摩訶薩無
量志菩薩摩訶薩法志菩薩摩訶薩彌勒菩
薩摩訶薩文殊師利童子菩薩摩訶薩那羅
延菩薩摩訶薩如是上首二萬菩薩復有四
萬天子皆向大乘及餘無量釋梵護世爾時
世尊與無量百千萬億大眾恭敬圍遶而為
說法爾時世尊却後三月當捨身命入般涅
槃當于是時佛法勝妙極為增盛隱蔽一切
諸外道等爾時千世界主那羅延菩薩從座

而起整於衣服右膝著地合掌向佛白言世
尊如來不久當捨身命畢竟涅槃今如來法
極為最上能悉隱蔽一切外道無信敬者善
哉世尊唯願如來護諸菩薩令得現生一切
諸善善根增上其心歡悅增益威德不斷佛
種護持法眼及與僧眼唯願如來攝救一切
諸衆生等分別演說向涅槃道所說正法若
佛滅後令諸菩薩流通不斷及阿耨多羅三
藐三菩提久住於世不離見佛聞法供僧增
益念力不忘諸法增益慧力覺了深法增長

進力得進解義得具慚力淨自心故具足愧
力捨離一切諸惡法故得堅固力威儀具足
故有牢強勇健除斷一切諸結使故有大雄
猛所住無畏故世尊云何菩薩摩訶薩不失
功德不失正法不失慧不失智不失菩提心
志念堅固親友究竟令諸衆生乃至涅槃如
說如作不誑衆生住滿佛法不求自施悉捨
於一切自如教住住三淨戒自住淨忍心無
麤獷於諸衆生其心平等自住精進作一切
業自住諸禪具三善戒自善住慈不依著於

一切禪定自住明慧離諸邪見一切法中得於照明以四攝法攝取衆生無有疲倦不求恩報常念修行一切人天所有善處住一切智心如門闔心不趣向聲聞緣覺心常趣法不趣於欲爲法王利非人天利行智慧行佛智所說以法養命非飲食活遠離貪欲攝受一切遠離瞋恚於諸衆生無侵害心遠離愚癡離諸法闇出過衆魔離諸結惱善巧方便善趣諸門如是問已默然而住爾時世尊告千世界主那羅延善哉善哉那羅延汝今乃

能爲諸菩薩問於如來如是之義那羅延汝今諦聽善思念之當爲汝說菩薩摩訶薩如是諸行所得功德復過於是時那羅延菩薩歡喜白言善哉世尊受教而聽佛告那羅延菩薩摩訶薩有三昧名集一切福德菩薩成就是三昧者不失功德不失正法不失於慧不失於智不失見佛聞法供僧勤修四攝自住布施乃至自住於善方便成就此功德及餘功德爾時世尊敷演說是集一切福德三昧名已即便默然爾時有大力士名曰淨威

成就大力居毗舍離大城作如是念我大力
士成就大力閻浮提中所有衆生無有大力
與我等者我先聞有沙門瞿曇成就大力具
足十力那羅延身復作念言我當往觀沙門
瞿曇何如我也爾時淨威力士出毗舍離大
城趣菴羅園大法講堂到已瞻覩如來應正
徧覺佛大威德百千萬衆恭敬圍遶而演說
法猶如須彌顯于大海周帀端嚴極爲微妙
當初覩見於如來時得大信樂愛敬之心即
前投地禮如來足右遶三帀却住一面合掌

頂上一心觀佛是時世尊知是淨威力士心
已欲降伏故告大目連汝往取吾昔菩薩時
爲娉瞿夷釋種女故角力時箭爾時目連白
世尊言我都不見知在何處爾時世尊從於
右足放大光明名曰照明是光遍照三千大
千此佛世界時三千大千世界之下大金剛
輪箭在彼豎爾時世尊告大目連汝見此界
大金剛輪箭在彼豎不目連白言已見世尊
佛告目連汝取持來時大目連即下至彼如
大力士屈伸臂頃一切大衆皆見其去即便

持來授與如來作如是言世尊是菩薩時父母生力為神通力佛言是菩薩時父母生力非神通力目連菩薩若以神通之力是箭即過無量無邊諸佛世界大德目連白言世尊如何乃是菩薩父母所生福德之力耶佛告目連如十人力等一健牛力十健牛力等一青牛力十青牛力等一凡象力十凡象力等一羅迦象力十羅迦象力等一迦尼象力十迦尼象力等一毘陀象力十毘陀象力等一無鬪象力十無鬪象力等一伊沙陀象力十

伊沙陀象力等一安禪象力十安禪象力等一娑摩象力十娑摩象力等一青象力十青象力等一黃象力十黃象力等一赤象力十赤象力等一白象力十白象力等一赤蓮華象力十赤蓮華象力等一紅蓮華象力十紅蓮華象力等一香象力十香象力等一大香象力十大香象力等一繫繡師子王力十繫繡師子王力等一力士力十力士力等一大力士力十大力士力等一遮窻羅力十遮窻羅力等一大遮窻羅力十大遮窻羅力等一

波捷提力十波捷提力等一大波捷提力十
 大波捷提力等一地天子力十地天子力等
 一堂天子力十堂天子力等一持風天力十
 持風天力等一持鬘天力十持鬘天力等一
 常醉天力十常醉天力等四天王中一天子
 力一切四天中天子力等一大天王力十大
 天王力等三十三天中一天子力一切三十
 三天中天子力等一帝釋力十帝釋力等焰
 天中一天子力一切焰天中天子力等一焰
 天王力十焰天王力等一兜率陀天中一天

子力一切兜率陀天中天子力等一兜率陀
 天王力十兜率陀天王力等化樂天中一天
 子力一切化樂天中天子力等一化樂天王
 力十化樂天王力等他化自在天中一天子
 力一切他化自在天中天子力等一他化自
 在天王力十他化自在天王力等魔天中一
 天子力一切魔天中天子力等一魔王力十
 魔王力等半那羅延力十半那羅延力等一
 那羅延力十那羅延力等一大那羅延力十
 大那羅延力等一百劫修行菩薩力十百劫

修行菩薩力等一千劫修行菩薩力十千劫
修行菩薩力等一萬劫修行菩薩力十萬劫
修行菩薩力等一百萬劫修行菩薩力十百
萬劫修行菩薩力等一千萬劫修行菩薩力
十千萬劫修行菩薩力等一百千萬劫修行
菩薩力十百千萬劫修行菩薩力等一千千
萬劫修行菩薩力十千千萬劫修行菩薩力
等一百千千萬劫修行菩薩力十百千千萬
劫修行菩薩力等一千千千萬劫修行菩薩
力十千千千萬劫修行菩薩力等一百千千

千萬劫修行菩薩力十百千千萬劫修行
菩薩力等一萬千千萬劫修行菩薩力十
萬千千千萬劫修行菩薩力等一無生法忍
菩薩力十得無生法忍菩薩力等一十地菩
薩力十十地菩薩力等一後身菩薩力是故
目連菩薩成就如是力故生便能行於七
步目連若此世界佛不持者便壞不任何以
故菩薩摩訶薩當其生已行七步時此界大
地縱廣六十八千由旬菩薩生已當下足時
便當都沒深百千由旬還舉足時復當涌出

百千由旬以佛持故今是世界不動無壞衆生無惱最後身菩薩始初生時則便具有如是力目連十初生菩薩力等一盛年菩薩力目連菩薩摩訶薩成就是力趣向道場覺於菩提如是當趣道場時力比道場上坐時之力超過百千復以如是無量無邊阿僧祇不可得不可壞力成就具足乃至成阿耨多羅三藐三菩提目連假使一切世界衆生悉得具足垂成菩提菩薩之力於如來處非處智力百千萬億分不及其一乃至算數譬喻所

不能及得具如是十種之力名爲如來應供正遍知是故目連如來之力爲本善根之所護持無增無減此中不明菩薩通力菩薩若用神通力者能以恒河沙等世界置於足指一毛端上擲過無量無邊恒沙世界如是往來不令衆生有於苦惱如是神力無量無邊不可思議不可稱量不可數知無等等若當如來盡現所有神通力者汝等聲聞尚不能信況復其餘諸衆生也目連菩薩趣詣道場上時觀於地大水火風大悉爲一界所謂空

界是故大地而不壞敗衆生無惱時淨威力
士從如來所聞說菩薩父母生力聞已驚怪
身毛皆豎生希有心從座而起整於衣服右
膝著地合掌向佛白言世尊我今憍慢悉皆
摧滅從如來所聞菩薩力故世尊我今歸依
佛法衆僧發於無上正真道心爲欲安樂一
切衆生願得具足如來之力爾時復有十千
天子聞淨威力士作如是語皆發無上正真
道心亦作是言世尊願令我等得如是力如
今如來應供正徧覺爾時那羅延菩薩白言

世尊云何名爲菩薩所修習一切福德三昧
如來先說是名字已即便默然世尊今開敷
演解說是集一切福德三昧云何菩薩得是
三昧爾時世尊告千世界主那羅延菩薩那
羅延無有菩薩發於無上正真道心而不修
是集一切福德三昧者何以故一切福德無
有不入初發心中那羅延猶如江河一切諸
流無有不入大海中者如是那羅延所有福
德若施戒修有漏無漏世間出世間若天若
人所有福德皆悉攝在發菩提心是故那羅

延若善男子善女人欲集一切諸福德者當發無上正真道心那羅延猶如寶山所謂須彌目真隣陀摩訶目真隣陀輪圍山大輪圍山及諸餘山藥木叢林村邑聚落大小諸城閻浮提弗婆提瞿耶尼鬱單越諸四天下及千世界二千世界三千大千世界欲界色界無色界日月星宿若日月蝕一切皆攝三千大千世界之內乃至百億四天下皆悉在中如是那羅延所有一切諸凡夫福若學人福無學人福若菩薩福若如來福一切皆攝在

於菩薩初發心中是故那羅延若欲攝取一切福德當發菩薩阿耨多羅三藐三菩提心那羅延若四天下一切衆生悉具轉輪大王福德若有初發大乘道心福德智慧殊勝於彼那羅延如四天下一切衆生乃至三千大千世界所有衆生是衆生界之所攝者是一衆生皆具轉輪大王福德是諸轉輪大王福德爲一轉輪大王德聚是一衆生復具是德於意云何是諸福德寧爲多不那羅延言是一人福尚多無數況復無量阿僧祇人

所有德聚佛言那羅延置是三千大千世界
所有衆生乃至恒河沙等世界所有衆生悉
具轉輪大王福德那羅延於意云何是諸德
聚寧爲多不那羅延言世尊若一三千大千
世界衆生具足轉輪大王所有德聚尚多無
量無邊阿僧祇況復無量無邊世界衆生具
足轉輪大王福德之聚那羅延我今知己而
唱是言有初發菩提之心所有德聚比前德
聚百分不及其一千分百分百千萬億分
乃至算數譬喻所不能及那羅延是名初說

入集一切福德三昧復次那羅延如千世界
梵王慈心普遍滿此一十世界那羅延有人
復以滿千世界七寶布施於意云何是人施
福梵王慈福何者爲勝那羅延言世尊梵王
慈福無量無邊那羅延置是千世界梵王慈
心若二千世界梵王慈心普遍滿此二千世
界那羅延若復有人以滿二千世界七寶持
用布施汝意云何是人施福梵王慈福何者
爲勝那羅延言世尊梵王慈福無量無邊那
羅延如三千大千世界梵王慈心普遍滿此

三千大千世界若復有人以滿三千大千世界七寶布施於意云何是人施福梵王慈福何者為勝那羅延言世尊梵王慈福無量無邊那羅延言世尊施福比慈百分不及一分百千分乃至算數譬喻所不能及佛言如是四千世界梵王慈心亦遍滿此四千世界五千世界梵王慈心亦遍滿此五千世界十千世界梵王慈心亦遍滿此十千世界百千世界梵王慈心亦遍滿此百千世界那羅延若人以滿百千世界所有七寶持用布施所

得福聚比慈福德慈福為勝那羅延正使是等三千大千世界之中一切衆生各具慈心如百千世界大梵天王所有慈心是諸慈心福德之聚欲比菩薩初發道心專志增上為脫一切所有衆生無幻無偽實為一切衆生修行慈心福德百分不及一千分百千分億分百億分千億分乃至算數譬喻所不能及那羅延是故當知若欲修習一切福德是善男子善女人應發阿耨多羅三藐三菩提心今發當發具足如是無量無邊福德之聚是

第二說入集一切福德三昧復次那羅延汝
意云何東方虛空為普遍不南西北方四維
上下所有虛空為普遍不那羅延言世尊東
方虛空尚不得邊何況十方不可說無量無
邊隨有世界虛空普遍佛言那羅延假令有
人乃至百千萬億劫中引諸喻說欲盡虛空
得其邊際不得其邊那羅延我今引喻以明
斯義為欲成滿是集一切福德三昧故亦令
增益諸有修習福德衆生增長志欲令向大
乘菩薩摩訶薩滿大精進那羅延若以芥子

盛滿三千大千世界乃至非想非非想處滿
中芥子假令有人持過東方百千恒河沙等
世界下一芥子如是東行盡是芥子猶不能
得世界邊際南西北方四維上下亦復如是
那羅延若復恒河沙等世界滿中芥子那羅
延頗有人天能數如是一切芥子知其數不
時那羅延白言世尊若四天下一切衆生成
就智慧如舍利弗於一劫數猶尚不能數其
一分況能數盡大芥子聚那羅延假令有人
過於東方恒沙世界著一芥子如是東行盡

是芥子猶故不得世界邊際南西北方四維
上下亦復如是那羅延如是世界虛空普遍
設有人天以滿中七寶持用布施那羅延於
意云何是福德聚寧為多不那羅延言無量
世尊無邊世尊佛言那羅延是人所有福德
之聚欲比初發道心菩薩成就志欲無幻無
偽勤修精進為脫一切衆生起大慈大悲所
集德聚是施德聚百分不及一乃至筭數譬
喻所不能及那羅延十方一切所有諸物虛
空悉受那羅延菩薩慈心亦復如是遍滿十

方諸佛世界所有衆生皆悉普遍那羅延是
菩薩慈心所及衆生令悉具足轉輪大王所
有福德如是帝釋所有福德如是梵王所有
福德若有菩薩初發道心專志趣向無幻無
偽勤修精進為脫一切所有衆生起慈悲心
而趣向之行於愍悼所得福德是福勝彼一
切衆生具轉輪王帝釋梵王所得功德那羅
延是第三說入集一切福德三昧復次那羅
延假令三千大千世界所有衆生皆具轉輪
大王福德比帝釋福德百分不及一乃至筭

數譬喻所不能及那羅延假令三千大千世界所有衆生皆爲帝釋比梵王所有福德百分不及一乃至算數譬喻所不能及那羅延假令三千大千世界一切衆生皆悉具足大梵天王所有福德比一斷欲優婆塞所有福德百分不及一乃至算數所不能及那羅延假令三千大千世界所有衆生皆爲斷欲優婆塞所有福德比舍利弗所有福德百分不及一乃至算數譬喻所不能及那羅延假令三千大千世界所有衆生福德智慧如舍利

弗比一緣覺所有福德百分不及一乃至算數譬喻所不能及那羅延若令三千大千世界所有衆生悉具緣覺所有福德比一五百劫中修行菩薩所有福德智慧百分不及一分集一切福德三昧應如是學說是法時三萬二千衆生皆發無上正真道心此三千大千世界六種震動人天妓樂同時俱作人天雨華積至于膝天龍夜叉乾闥婆釋梵護世皆作是言世尊是初發心者悉勝我等世尊我等亦當利是善男子善女人已發今發當

發阿耨多羅三藐三菩提心者如我等解佛
 所說義若有衆生不發無上正真道心則不
 能趣是集一切福德三昧不能正入若有衆
 生發於無上正真道心則能得趣是集一切
 福德三昧亦能正入爾時淨威力士白言世
 尊以何等法能得成就攝此集一切福德三
 昧佛言善男子成就一法攝此集一切福德
 三昧何等一法謂不捨於一切智心善男子
 是名成就一法攝此集一切福德三昧復次
 善男子復成就二法攝此集一切福德三昧

謂聞法無厭聞已修行善男子是名成就二
 法攝此集一切福德三昧復次善男子復成
 就三法攝此集一切福德三昧何等三謂離
 諸惡修行善法善巧迴向善男子是名成就
 三法攝此集一切福德三昧復次善男子復
 成就四法攝此集一切福德三昧所謂成就
 淨見淨心淨慧淨善男子是名成就四法攝
 此集一切福德三昧復次善男子復成就五
 法攝此集一切福德三昧何等五所謂專意
 發菩提心常真實語無有諂偽無有嫉妬於

一切衆生心常平等善男子是名成就五法
攝此集一切福德三昧復次善男子復成就
六法攝此集一切福德三昧何等六所謂親
近於善知識離惡知識遠離衆鬧閑居寂靜
不捨大慈於諸衆生起大悲心善男子是名
成就六法攝此集一切福德三昧復次善男
子復成就七法攝此集一切福德三昧何等
七所謂修定善於智慧善知於因善知於緣
正直而住修習於道修行道時無有懈怠善
男子是名成就七法攝此集一切福德三昧

復次善男子復成就八法攝此集一切福德
三昧何等八謂調柔身調柔心觀受觀法未
生惡法令其不生已生惡法斷之令滅未生
善法方便令生已生善法護令增長善男子
是名成就八法攝此集一切福德三昧復次
善男子復成就九法攝此集一切福德三昧
何等九觀過法無盡現法無盡來法無盡觀
法如幻等覺三世如一切法知而忍之不謗
於空不分別無相不願諸有善男子是名成
就九法攝此集一切福德三昧復次善男子

復成就十法攝此集一切福德三昧何等十
謂解無我想忍於無命不疑無人緣法無常
於諸生處如地獄想觀四大如毒蛇觀入如
空聚觀陰如魁膾流出諸有想樂修解脫善
男子是名成就十法攝此集一切福德三昧
爾時淨威力士白佛言世尊若菩薩摩訶薩
欲成就一切福德莊嚴者應聽是三昧菩薩
摩訶薩欲集一切福德者應聽是三昧若菩
薩摩訶薩欲得不思議福德者應信是三昧
應聽是三昧若菩薩摩訶薩欲得無盡福德

者應當修行於是三昧若菩薩摩訶薩欲到
一切福德大海者應當受持讀誦修行於是
三昧若菩薩摩訶薩欲得百福相者應當修
行於是三昧爾時淨威力士復白佛言世尊
菩薩摩訶薩何法相應成就滿此一切福德
莊嚴修習一切福德不可思議福德無盡福
德大海福德滿百福相爾時佛告淨威力士
善男子有於三法為福德柱福德莊嚴福德
來集福德增廣福德無盡福德大海福德巨
思何等三謂布施莊嚴持戒莊嚴多聞莊嚴

善男子云何菩薩摩訶薩修行布施莊嚴善男子菩薩摩訶薩應生是心若布施時不見施心不見所施及以受者不見眷屬若有乞者來有所求爲攝護故不以王位封邑財物諸珍寶等而有惓惜生於異心善男子是菩薩摩訶薩作如是念今我此身悉已給施一切衆生況餘財物若已施者終無悔心須財施財須食施食須飲施飲須眼施眼須肉施肉須血施血須髓施髓須於支節施與支節須頭施頭我悉當施況餘財物穀米金銀衣

服瓔珞象馬車乘國城王宮男女妻妾奴婢眷屬無不捨者若有衆生隨其所須而求索之我隨所有悉當施與無有憂悔不望其報起慈悲心爲攝衆生攝取衆生乃至成佛終無有盡善男子若有菩薩發如是心是名菩薩布施莊嚴復次善男子菩薩不自觀計身命寧捨身命終不爲惡不爲養身邪命自活寧捨身命不惱於他不爲封邑造行諸惡不爲眷屬熾然諍訟不爲妻妾及以男女嫉利他財不生慳心常恒少欲乃至不生一念惡

心況復多也爲斷慳貪不生瞋恚無瞋恚故
正行相應正行相應故到於正處到正處故
正戒相應正戒相應故親善知識恭敬供養
恭敬供養善知識故得聞正法聞正法已如
說修行如說修行已則能利益邪道衆生不
作衆惡隨順善法得智方便知衆生根善男
子而是菩薩行施莊嚴得是功德復次善男
子菩薩摩訶薩不生內外想若內地大若外
地大等無異想何以故身猶如牆壁草木如
影如焰無知無思無作無堅四大所攝若有

凡八

十六

斫截刀杖瓦石搗打之者終不生報不觀計
身不受壽命於諸衆生不起瞋恚彼衆生所
修慈悲心善男子猶如藥樹若有取根莖節
枝葉華鬚及果終不作念取根莫取莖取莖
莫取根如是乃至枝葉果實亦爾而是藥樹
都無想念然能寂滅一切衆生若上中下所
有病患如是善男子菩薩摩訶薩於四大身
生藥樹想隨諸衆生須手與手須脚與脚須
眼與眼須肉與肉須血與血須骨與骨須髓
與髓須頭與頭須支節者施與支節善男子

貧聖法成大封邑住在法流獲得大財具足
 七財成大福德持百福相為大福田養育一
 切諸衆生等

集一切福德三昧經卷上

音釋

娉匹正切 繫繫古詣切 寃奴侯切 擲直炙切
 也 也 也 也
 食虫來力切 悼徒到切 關奴教切 叵普火切
 也 傷也 宜宜蕭也 切 不

永樂北藏

集一切福德三昧經

第三六册

若是菩薩以如是心行施莊嚴趣向無盡菩薩摩訶薩行布施時為慳衆生令成滿施少福衆生具滿福德貧窮衆生滿大封邑若捨支節為令衆生具滿支節如是布施不向三處何等三不求王位自在不求大富自樂不比向聲聞緣覺菩提如是布施為滿四淨何等十七四淨謂佛土淨菩薩僧淨化衆生淨迴向一切智淨菩薩摩訶薩應當如是迴向四淨復次菩薩摩訶薩施主無盡何等名為菩薩施主善男子菩薩摩訶薩有四法布施是施有

盡何等四謂不迴向無有方便所為下劣近惡知識善男子是名菩薩四法布施是施有盡善男子菩薩有四法布施施主無盡何等四謂迴向菩提有巧方便為得法王近善知識善男子是名菩薩四法施主而不可盡復次善男子菩薩摩訶薩應念三法而行布施謂念不離菩提之心憐愍一切所有衆生不違佛語不望果報善男子是名菩薩念於三法而行布施復次善男子菩薩摩訶薩安置衆生於三法中而行布施何等三謂安衆生

菩提道中而行布施為安衆生善讚法中而行布施為安衆生著無上門中而行布施善男子是名菩薩摩訶薩安置衆生於三法中而行布施復次善男子菩薩摩訶薩希望一法而行布施何等一所謂希望有大封邑能行捨心善男子是名菩薩希望一法而行布施復次善男子菩薩摩訶薩為滿二法而行布施何等二謂智與慧善男子是名菩薩摩訶薩為滿二法而行布施復次善男子菩薩摩訶薩進趣二法而行布施何等二謂盡智

無生智善男子是名菩薩摩訶薩進趣二法而行布施復次善男子菩薩摩訶薩修行四施何等四謂等心行施不望果報施向菩提施滿調寂施善男子是名菩薩修行四施是故善男子菩薩欲趣至無盡福應當修行如是布施爾時淨威士即白佛言希有世尊如來說施攝取一切佛之正法世尊若有菩薩成就是施無有能量是菩薩福佛言如是如是善男子若有菩薩成就具足如是布施知是菩薩成就具足無盡福德大海福德不

化八

十八

集一切福德三昧經卷中

化九

姚秦三藏法師鳩摩羅什譯

爾時佛告淨威力士善男子云何菩薩摩訶
薩淨戒莊嚴謂戒淨無缺不捨學戒愍於毀
禁極敬持戒淨身三業淨口四過淨意三業

化九

自成十善教他十善不自稱譽不起戒慢勤
進修戒頭陀德中心不動轉住於聖種自護
己心不見他過不作衆惡不願諸有亦不喜
樂勸他修善勤營助他不希望樂勸人布施
不捨阿練若處為病給使作已歡喜如說如

作失利不憂得利不高毀譽稱譏及與苦樂
心不傾動斷除愛恚不懷怨嫌修行慈心等
視怨親不以戒自高不向餘乘不禮餘天捨
離諸見蓋覆使纏斷除滅悔捨財無悔心生
歡喜不生諸有心不願樂忍於疲苦善護進
心遠離著心不驚怖畏無生法忍善男子善
薩摩訶薩為習此戒乃至失命終不毀犯不
為王位護持禁戒不為生天不為帝釋不為
梵王護持禁戒不為封邑不為自在不為妙
色護持禁戒不為端正不為名稱不為讚歎

不為利養不為恭敬不為活命不為飲食不為卧具不為病藥護持禁戒不為眼色不為耳聲鼻香舌味身觸心法護持禁戒不依倚色不依受想行識護持禁戒不依欲界色界無色界護持禁戒不畏地獄餓鬼畜生不為救護護持禁戒不畏人道貧窮困苦護持禁戒不畏天道貧窮苦故護持禁戒不畏龍夜叉乾闥婆阿脩羅緊那羅迦樓羅摩睺羅伽貧苦惱故護持禁戒為佛種故護持禁戒為住聽法如聞而行護持禁戒為僧種故護持

禁戒為欲出過生老病死憂悲苦惱故護持禁戒為欲解脫諸眾生故護持禁戒為安樂利益諸眾生故護持禁戒欲住佛法故護持禁戒欲轉法輪故護持禁戒為集聖種故護持禁戒為不斷佛法僧種故護持禁戒為妙神通故護持禁戒為戒定慧解脫_{化九}解脫_二知見故護持禁戒為神足變化應現無方護持禁戒如是持戒不毀不缺不穿堅實無所作為具足成就精妙無染清淨香潔智者所讚諸佛所歎如法修行堅固真實若菩薩成就如

是持戒不失十法何等十法謂不失於轉輪
王位既在是位不生放逸希望欲得無上菩
提願得見佛不失帝釋既在是處不生放逸
希望欲得無上菩提願得見佛不失梵王既
在是處不生放逸希望欲得無上菩提願得
見佛淨信正真不失聞法如所聞法善能分
別不失攝取菩薩智慧不失無斷無礙辯才
不失集聚一切善根不失一切諸佛聲聞緣
覺所讚不失疾能通達一切諸佛智慧若菩
薩成就如是持戒不失此十法菩薩成就如

是戒聚諸天常禮諸龍宗敬夜叉常供諸乾
闥婆亦常供養阿脩羅敬侍諸王婆羅門長
者居士皆尊重之智者常趣諸佛常念諸天
世人常師事之常愍衆生若菩薩如是淨持
戒聚不生四處除化衆生何等四不生邊地
不生無佛國不生邪見家不生惡道菩薩如
是淨持戒聚不生四處復次善男子菩薩如
是淨持戒聚不失四法何等四所謂不失菩
提之心不失念佛不失聞法既聞法已乃至
無量阿僧祇劫而不忘失是爲菩薩淨持戒

聚不失四法善男子若菩薩如是淨護戒聚
不值四處不值法滅不值刀兵劫不值飢餓
劫不值劫燒菩薩如是淨持戒聚不值是四
復次善男子菩薩如是淨持戒聚得四勝法
謂不誑佛不誑諸天不誑衆生不誑自心善
薩如是淨持戒聚得四勝法復次善男子菩
薩成就護持戒聚離十種畏何等爲十離地
獄畏離畜生畏離餓鬼畏離貧窮畏離不稱
讚畏離諸纏畏離諸聲聞緣覺位畏離天龍
夜叉乾闥婆阿脩羅迦樓羅緊那羅摩睺羅

拘辦荼羅刹等畏離魁膾刀杖火毒等畏離
諸師子虎豹熊羆及多勒叉狐狼蟒蛇猫鼠
百足毒蛇蛆螫王賊等畏菩薩如是住淨戒
聚離十種畏善男子菩薩持戒則能發起一
切佛法乃至起於無上菩提何以故若有持
戒便有三昧若有持戒便有智慧若有持戒
便有解脫若有持戒便有解脫知見善男子
云何名戒戒者名爲寂調結使以何緣故名
爲結使以染汙三有諸衆生故名爲結使云
何名寂無妄想無分別無起著永不思念一

切諸法名寂調一切結使善男子若菩薩
摩訶薩不能如是知寂調結使是不名為戒
聚清淨何以故若不能知寂調結使雖生梵
世猶為結染乃至非想非非想處猶為結使
善男子是故當知寂三界結名淨戒聚爾時
淨威力士白佛言世尊若離三界諸結使染
名淨戒聚世尊何故為菩薩時離三界結還
生其中爾時世尊告淨威力士善男子菩薩
摩訶薩不以自結生於三界以方便故同在
三界無三界結化衆生故善男子假使人天

能畫虛空現諸色像於意云何為希有不如
是世尊如是善逝是人所作甚為希有佛言
善男子菩薩捨離一切諸結使處在三界現
三乘教化是乃希有淨威力士言世尊是菩
薩成就住解脫門憐愍衆生還住三界世尊
譬如有人從魁膾所得全身命既得脫已復
還其所而語之言汝今殺我莫殺餘人世尊
是三界者如魁膾舍一切衆生喻應死者生
死諸行猶如魁膾從得脫者猶如菩薩脫三
界已為化衆生為脫衆生還住三界世尊是

菩薩大悲諸聲聞緣覺所不能及何以故聲聞緣覺無是大悲無善方便無淨戒莊嚴世尊復告淨威力士善男子云何菩薩摩訶薩善能修習多聞莊嚴求學多聞善男子菩薩摩訶薩於諸和尚阿闍黎所恭敬供養尊重讚歎化九隨教誨行除捨憍慢五速受教誨於正法中生起藥想於和尚阿闍黎所生起佛想於自身所起病人想於說法者起明醫想為集佛法不愛身命於諸財物衣鉢之餘起惱結想雖具封祿不生愛著為重法故一切悉捨

為護正法應捨一切世間珍寶為得法樂應捨一切名譽讚歎為得法王捨諸王位為捨一切諸結使故應當勤修習法相應為救一切諸眾生故應當勤修習法相應菩薩摩訶薩修習諸法者一切善根自然而得是故善男子菩薩摩訶薩欲成菩提欲豎立智柱應修多聞善男子如帝釋堂因柱得住三十三天在中歡樂如是善男子由菩薩智柱一切天人悉蒙受樂善男子若有菩薩發菩提心菩提所攝言欲作佛於多聞中而不勤修於

諸衆生最爲無智是故善男子菩薩摩訶薩
應勤精進修習多聞諸衆生中爲多聞柱是
時諸天歡喜踊躍是善丈夫堅牢精進修習
智慧必能獲得於佛十力是善丈夫當以慧
力斷諸結網是善丈夫當演說法斷於一切
衆生結使是善丈夫當徃至彼菩提樹下諸
佛坐處是善丈夫當以自力降一切魔是善
丈夫當轉十二行相法輪善男子若有菩薩
修多聞時一切魔宮皆悉闇蔽三千大千世
界魔王皆悉憂惱作如是言是人今者勝過

我等其餘魔天各作是言是人降伏於我等
主我等一切悉屬是人何以故善男子由是
菩薩集多聞慧能寂結使以無結使魔不得
便已有多聞則能分別既能分別則能修行
已能修行魔不得便修多聞者遠離邪見得
住正見已能正住魔不得便則能正修已能
正修能分別義離諸非義便能正度義及非
義善男子以是因緣故應如是知善男子菩
薩修習是多聞時除四種魔所謂陰魔煩惱
魔死魔天魔善男子如本菩薩習多聞時欲

法利法善住於法我今少說善男子乃往過
世阿僧祇劫無量無邊不可思議爾時有大
仙人名曰最勝仙住山林中具五神通常行
慈心作如是念我今山中修行慈心無所利
益不但慈心能滅衆生無量劫中所集煩惱
生此慈心能起正見復作是念因於何事能
起正見作是念言有二因緣能起正見謂從
他聞聞已正思以是二法能生正見是時便
生求多聞心當從何處得聞善說為法因緣
集法相應爾時仙人至諸聚落封邑郡縣王

城處處推求多聞了不能得說法之師時魔
天子來至其所作如是言我今有佛所說一
偈是最勝仙聞佛偈名即語之言為我演說
時天報言汝今若能剥皮為紙以血為墨析
骨為筆書寫此偈乃當相與佛所說偈善男
子時最勝仙作是念言今我此身無量生死
在在處處賊兵魁膾百千劫中常以無事墮
在彼手利刀割截分解支節或為欲故或財
利故殺縛捶打繫閉訶罵受無量苦都無利
益唐受割截我今當以此不堅身易得妙法

歡喜踊躍我得大利聞是法語於此天所生
師宗想即以利刀自剥身皮乾以為紙復刺
出血用以為墨復析其骨削以為筆合掌向
天而作是言天為我說佛所得偈如先所勅
剥皮為紙出血為墨析骨為筆我悉作已善
男子時魔天子見最勝仙恭敬為法見已愁
悴即便隱去善男子時最勝仙見天沒已作
如是念我今為法生恭敬心剥皮為紙析骨
為筆我今如此恭敬求法而是善根終不敗
亡若我此言誠實不虛起慈悲心為諸眾生

不惜身命剥皮為紙出血為墨析骨為筆若
我至心誠實不虛餘方世界大慈大悲能說
法者當現我前善男子最勝大仙作是語時
一念之頃東方去此佛土三十二佛刹彼有
國土名普無垢是中有佛號淨名王如來應
供正徧覺今者現在知最勝仙心念所作亦
欲教化是閻浮提諸眾生故譬如壯士屈伸
臂頃乘空而來到是最勝仙人前住及五百
菩薩是淨名王如來放大光明徧照彼林天
雨眾華時彼樹林枝葉華果皆出法音爾時

無量百千萬億諸天來集是時彼仙得淨名
王佛光觸身已苦痛悉除還復如故無有瘡
般爾時彼仙頭面敬禮佛世尊足右遶三帛
合掌頂上白淨名王佛而作是言世尊是我
師善逝是我師世尊我今歸依佛歸依法歸
依僧惟願世尊化九為我說法我聞法已不信衆
生行邪見者壞正見者行黑闇者導示正故
而為說法善男子爾時淨名王佛因最勝仙
及諸天子諸菩薩等為其演說此集一切福
德三昧法彼天衆中八千天子本種善根皆

發無上正真道心最勝大仙得大喜悅生於
大信得無礙辯彼佛如來復為演說八金剛
句何等八一切諸法性本淨句一切諸法離
結使故一切法無漏句盡諸漏故一切法離
巢窟句過巢窟故一切法無門句無有二故
一切法普徧句示解脫門故一切法無去句
無去處故一切法無來句斷諸來故一切法
三世等句去來現在無二相故彼淨名王佛
演說如是八金剛句是中開解一切法義復
更演說餘八法門令菩薩摩訶薩疾成就智

何等八謂一切法名字門以名分別一切法
故一切法音聲門以言分別令歡喜故一切
法共要門一切諸法決定相故一切法言說
門虛妄自在故一切法自相門離他相故一
切法畢竟盡門無所有故一切法分別門從
分別有故一切法平等門等一味故最勝是
名八法門疾成就智最勝復有八字種子門
能成就於無盡辯才何等八一切法阿字種
子門示法無生故一切法闍字種子門示第
一義法故一切法那字種子門示字名色故

一切法遮字種子門示現一切法調伏故一
切法婆字種子門示一切法入平等故一切
法多字種子門示如不壞故一切法迦字種
子門滅苦業故一切法摩字種子門究竟成
就斷一切法故是名八字種子門能成就於
無盡辯才是故最勝是八字種子門八法
句門八金剛句門正念修行常離憤鬧恒善
思惟觀察修習功德之利善男子淨名王如
來說是法已放大光明徧照世界震動大地
即沒不現與諸菩薩還至彼土彼諸衆生都

不覺知佛來去時善男子爾時最勝大仙成就聖辯諸天子侍衛諸天守護為降魔故至諸聚落諸城國邑為諸眾生廣敷演說此集一切福德三昧滿于千歲常演說法令八萬四千眾生住聲聞乘八萬四千眾生住緣覺乘八萬四千眾生住於大乘八萬四千眾生作轉輪王八萬四千眾生作釋提桓因八萬四千眾生得作梵王八萬四千眾生修行於慈八萬四千眾生修行於悲八萬四千眾生修行於喜八萬四千眾生修行於捨無量眾

生得生天上是最勝大仙後乃命終即往生彼淨名王佛普無垢土及八萬四千天子亦生彼土善男子於意云何爾時最勝仙者豈異人乎汝勿有疑即我身是我本如是欲法敬法說誠實語便能感彼淨名王佛來至我所是凡九以當知若有菩薩恭敬求法則於其人佛不涅槃法亦不滅何以故淨威若有菩薩專志成就求正法者雖在異土常面覩佛得聞正法淨威若菩薩摩訶薩欲法敬法令諸山巖樹木林藪出諸法藏陀羅尼門及諸經

卷自來在手淨威諸有菩薩敬法欲法若有
諸天曾見佛者來至其所從於佛所得聞諸
法具為演說淨威利法菩薩若其壽盡諸佛
世尊增益其壽佛力持故欲住千歲即便能
住二千三千四千五千乃至一劫若減一劫
隨意得住淨威若有菩薩敬法欲法不老不
病得憶念力進趣智慧得於辯才若有菩薩
敬法欲法得見佛已捨離諸見趣入正見淨
威若有菩薩敬法欲法一切衆生無能侵害
是故淨威是大衆生應當勤修多聞莊嚴所

獲功德復過於淨威若有菩薩住是三福
莊嚴福柱廣福增福無盡福不思議無有能
得是福邊者淨威可以一毛數大海滴無有
能盡是菩薩莊嚴福聚淨戒多聞慧聚得其
邊者淨威能稱三千大千世界草木山林及
諸衆生得其輕重不能稱量如是菩薩莊嚴
福戒多聞慧聚得其邊者是名解脫智莊嚴
已爾時淨威力士白佛言世尊布施莊嚴淨
戒莊嚴多聞莊嚴是三莊嚴何者為最何者
為勝佛言淨威三莊嚴中多聞莊嚴最可稱

歎最勝尊上無上無上善男子如須彌邊
著一芥子而是施福及淨戒聚亦復如是猶
如芥子多聞莊嚴如須彌山善男子如一小
鳥所住處空施戒莊嚴亦復如是多聞莊嚴
如餘虛空善男子布施莊嚴能作二事何等
為二能除貧窮成大封祿淨戒莊嚴亦作二
事何等二一離惡道二至善處善男子多聞
莊嚴亦作二事何等二謂能除去一切諸見
能集一切智慧莊嚴善男子布施莊嚴是有
漏報淨戒莊嚴亦有漏報善男子多聞莊嚴

無漏無報是故善男子菩薩摩訶薩應勤精
進修多聞慧說是施福淨戒多聞莊嚴法時
三千衆生本種善根便發無上正真道心五
十天子於諸法中遠離塵垢得法眼淨淨威
力士得無生法忍爾時淨威力士白佛言世
尊菩薩摩訶薩成就幾法疾能獲得無生法
忍佛言善男子菩薩成就四法疾能獲得無
生法忍何等四謂解知身猶如鏡像解知言
說猶如響聲解心如幻解諸法無二淨威當
知菩薩成就是四法者疾能獲得無生法忍

復次善男子菩薩摩訶薩成就四法疾能獲得無生法忍何等四謂慈普覆徧一切衆生無衆生想解諸法空不見所解觀見佛淨不以肉眼住於慧眼善分別心而不見心不依倚心善男子菩薩成就是四法者疾能獲得無生法忍復次善男子菩薩成就四法疾能獲得無生法忍何等四所謂不捨一切衆生捨離諸見護持淨戒寂一切結善男子菩薩成就四法者疾能獲得無生法忍復次善男子菩薩成就四法疾能獲得無生法忍何等

為四謂有忍力法轉增勝勤行精進解法寂靜善男子菩薩成就是四法者疾能獲得無生法忍復次善男子菩薩成就四法疾能獲得無生法忍何等四所謂得禪而不依禪以慧分別無有戲論成就方便攝取衆生增長諸行善知諸行善男子菩薩成就是四法者疾能獲得無生法忍復次善男子菩薩成就四法疾能獲得無生法忍何等四謂以大慈救諸衆生謂以大悲不厭生死謂以大喜欣樂於法謂以大捨斷一切愛善男子菩薩成

就是四法者疾能獲得無生法忍復次善男子菩薩成就四法疾能獲得無生法忍何等四謂得三解脫門解知三世超過三界信法性無生善男子菩薩成就是四法者疾能獲得無生法忍演說如是諸四法時淨威力士得無生法忍歡喜踊躍上昇虛空高七多羅樹爾時三千大千世界六種震動人天妓樂同時俱作天雨華雲大光普照徧此世界爾時世尊即便微笑諸佛常法若微笑時若干百千青黃赤白紅紫等光從面門出徧照無

化九

十三

量無邊世界上過梵世還遶身三帀從頂相入時大德阿難即從座起整衣服徧袒右肩右膝著地合掌向佛白言世尊佛不妄笑今者世尊何緣而笑說偈問曰

得無上智無垢眼 諸根寂靜到彼岸

大光須彌金山色 導師以何因緣笑

善知衆生諸根行 淨慧相應知三世

得於無想最上智 面如滿月說笑緣

如過去佛及未來 現在諸佛尊亦爾

種種真實清淨行 善知一切如實義

其身普徧諸佛界
 慈心普徧諸衆生
 自在知法如水月
 如空如電清淨法
 解空無相無願法
 如風遊行虛空中
 今佛智慧知誰心
 誰當坐於金剛座
 非是聲聞之境界
 是佛大海智境界
 音聲亦滿諸佛界
 願說誰與智相應
 如幻化相亦如夢
 今人師子何緣笑
 善性實性常調心
 惟願演說何緣笑
 誰應道樹下降魔
 人仙今者何緣笑
 亦非緣覺之所及
 願說所為之因緣

爾時佛告阿難汝今見是淨威力士住虛空
 不阿難是淨威力士過三百億阿僧祇劫當
 得作佛號多莊嚴王出現於世如來應供正
 徧覺明行足善逝世間解無上士調御丈夫
 天人師佛世尊於此東方國名嚴淨劫名梵
 歡阿難當知是多莊嚴王佛嚴淨國中當得
 成佛其土豐樂安隱熾盛是諸人衆所受用
 物如兜率天是莊嚴王佛不說餘法唯菩薩
 乘乃無聲聞緣覺乘名純菩薩僧皆得法忍
 無諸八難無有魔怨及諸外道彼佛壽命無

比九

十四

有限量瑠璃為地閻浮那提金華以間錯之
爾時淨威力士從空而下頂禮佛足合掌向
佛求索出家佛即聽許爾時那羅延菩薩白
言世尊未曾有耶善逝未曾有耶乃能以是
勝妙善法善調衆生乃至能令如是憍慢競
勝衆生是等當見佛如來時即得歡喜除捨
憍慢禮如來足如此淨威大慢力士除捨慢
已得勝上法復能調伏無量衆生除捨憍慢
世尊是淨威力士為曾供養幾佛世尊種諸
善根乃能如是速疾開解爾時佛告那羅延

菩薩那羅延是淨威力士曾於過世供養六
十二億諸佛種諸善根從今已後當復值遇
無量無邊阿僧祇佛恭敬供養尊重讚歎淨
修梵行那羅延言世尊是淨威力士復以何
緣懷大憍慢求佛競勝佛告那羅延菩薩摩
訶薩有四法忘善提心何等四謂增上慢不
化九
敬重法輕善知識說不實語那羅延菩薩有
此四法忘善提心那羅延菩薩摩訶薩復有
四法忘善提心所謂讚歎趣向聲聞緣覺乘
者訶向大乘毀訾菩薩恪惜於法那羅延菩

薩有是四法忘菩提心那羅延菩薩復有四
法忘菩提心何等四於諸衆生行幻惑術詐
偽親近於善知識合偶言說為利養故那羅
延菩薩有是四法忘菩提心那羅延菩薩復
有四法忘菩提心何等四不覺魔事不除業
障志意羸弱無方便慧那羅延菩薩有是四
法忘菩提心那羅延是淨威士本造惡業
忘菩提心我今當說汝善聽之乃往過世此
賢劫中有佛出世號迦迦孫是佛法中有大
婆羅門名曰善財起大憍慢得增上慢不往

佛所憍慢增上與說王法諸婆羅門而共諍
競是憍慢故獲得現報退失多事謂不見佛
不聞正法亦不得聞趣向菩薩大乘法亦
不得聞諸天請法亦不得聞功德善根迴向
菩提而不堅固為此王惡法遮持故離菩提
心那羅延於意云何爾時善財婆羅門者豈
異人乎汝勿有疑即今淨威士是也以憍
慢故忘菩提心以菩提心本善根故不墮惡
道雖成大力猶有憍慢佛力所持得聞佛力
及菩薩力捨離傲慢得來見佛不作衆惡因

本善根今現發起速疾得是無生法忍爾時
那羅延菩薩語淨威力士汝住何法得無生
忍而受記荊淨威答言我以生起諸凡夫法
得受記荊那羅延言云何而生淨威答言生
如不生如是生滅如不滅如是滅如是而生
亦復不住那羅延言善男子若其爾者佛法
凡夫法有何差別淨威答言以文字故有差
別耳若以其義則無差別那羅延言是凡夫
法有何義耶淨威答言無妄想無分別是凡
夫法義那羅延言是義何趣淨威答言而是

義者離凡夫法趣於佛法那羅延言佛法有
何義淨威答言不作二是佛法義那羅延言
善男子如佛所說依法不依人又復說言有
二因緣起於正見何等為二因外言聲內善
思惟如是之義即是文字淨威答言那羅延
依法菩薩不取文字不取非文字若得文字
是即為義而是義者是不得義是故不依於
義一切諸法都無有義何以故一切諸法不
可得故非方不離方隨所住處即處自滅如
佛所說畢竟滅相是名為義是故那羅延依

義者無法可依無不可依若依非依是名爲
義那羅延言善男子頗有依義即是依於一
切法耶淨威言有那羅延一切法空一切法
寂一切法空依亦如是一切法寂依亦如是
如是那羅延若依是義即依諸法那羅延言
淨威若如是者一切諸法常自是依淨威答
言如是如是那羅延一切諸法皆第一義依
第一義者彼得安樂彼應當求於第一義若
能不起法及非法不求二不求不二是名爲
聖分別選擇而是選擇無作無不作若作無

不作是名爲作所求者義不相違淨威力
士說是法時五百比丘不受諸法漏盡心得
解脫八千天子遠離塵垢得法眼淨爾時那
羅延菩薩語淨威力士如佛所說依義不依
文然此衆生不解是義行於二行是不解文
亦不解義爲是不解故說依義不依於文依
文依義是義出過於諸文字善男子如佛所
說有二因緣能生正見謂彼有人不聞正法
調伏法中以少緣故便生歡喜言我出生死
彼是增上慢本是增上慢爲勸是人令勤修

行彼聞法已即便修行趣於正道是故佛說
聞已得知法 聞已不作惡 聞已離無利
聞已得涅槃

那羅延言云何比丘念法相應淨威答言無
相應無不相應若能如是念法相應那羅延
言彼修行者是語相應復次那羅延若有比
丘與念法相應則不起瞋不起憍慢是名正
思惟若有觀察說法去來現在若解所說為
斷故說為解故說為修故說不得過去世之
所作不得未來世之所作不得現在世之所

作是正修行若正觀一切法性常滅是名正
修思惟所見若見一切法性常寂是名修正
思惟所見若正觀一切法性常定是名修正
思惟所見若正觀諸法畢竟不生是名修正
思惟所見若正觀一切法實無常是名修正
思惟所見若正觀一切法無常滅是名修正
思惟所見若彼見者及以所見都不可見如
如見如不見如是名為說示思惟是時世尊
讚淨威力士善哉善哉善男子汝之所說如
是相應若能如是則於諸法無有愚癡如是

化九

十八

修行則無有障正修行者無縛無解何以故
 正思惟者於一切法無斷無趣若如是者名
 為正見見一切法如是正見云何正見謂不
 見法所言見者是說無生不實之言語不實
 者說無生名如我所說諸法無生以慧初見
 若至正位名為正見若如是見名至正位以
 何因緣名為正位我與無我二俱平等如無
 我等諸法等起是名正位

集一切福德三昧經卷中

永樂北藏

集一切福德三昧經

第三六册

音釋

熊羆 熊胡弓切羆並徒殿切 為蟒 莫朗切也 旦 知
 列切 剝也 剝 北角切 析 先擊切也 捶打 黑切
 剗 郎葛切 剗 北角切 癩 蒲官切 憤 古對切 傲慢 傲
 打都 徒切 推 癩瘡痕也 憤 心亂也 傲慢 五
 打並 擊也 癩 瘡痕也 憤 心亂也 傲慢 五
 到切 橋也 慢 佛之說劫國名號之別也
 莫 莫切 慢 佛之說劫國名號之別也

永樂北藏

集一切福德三昧經

第三六册

集一切福德三昧經卷下

化十

姚秦三藏法師鳩摩羅什譯

爾時那羅延菩薩即白佛言希有世尊希有善逝諸法如是性常寂滅菩薩摩訶薩能聽是法能知是法能信是法不中涅槃佛告那羅延菩薩方便化十能如是若菩薩成就善方便者於念念中能得四法何等四謂大慈大悲知一切智佛出於世不斷法種如是四法修行諸法知衆生界是正位相知一切法性常寂滅聞知信解不中涅槃是名調伏法知

利衆生知己而見乃至不見何以故不捨一切諸衆生故爾時淨威力七白言世尊菩薩摩訶薩如佛所說不墮正位佛言善男子是菩薩摩訶薩不作諸見然事無不辨聲聞之人不緣一切衆生不緣佛種不緣法種不緣大乘捨一切智不觀一切智不願一切智滅有為法入聲聞位菩薩摩訶薩緣一切衆生緣不斷三寶種緣於大乘觀一切智不觀於命知諸法一相不入正位緣諸衆生遊戲諸禪不墮聲聞位善男子是故當知菩薩摩訶

薩常恒無我不墮正位爾時淨威士白佛
言希有世尊希有善逝菩薩所行一切聲聞
緣覺之人所不能及爾時文殊師利法王子
在會而坐那羅延菩薩白佛言世尊是文殊
師利法王之子在此會坐乃能於是集一切
福德三昧而無所說爾時文殊師利語那羅
延菩薩言善男子菩薩摩訶薩不為福德故
修行菩提菩薩不為利養名稱不為生天不
為封邑不為眷屬不為讚歎不為自樂修行
菩提那羅延言文殊師利菩薩以何而行菩

提文殊師利言善男子菩薩為悲諸衆生故
修行菩提為於法故為脫一切衆生苦故為
斷不實諸煩惱故忍自苦故無所為故修行
菩提不惜身命觀知無主無宰無居無想無
思無轉無壞無遷流轉無侵毀害勇健無降
無知解無懶惰無怖無畏無驚無恐無高無
下無諂曲堅住不動樂寂獨一一道一趣住
於一道修行一道為度一切諸衆生故為如
是利故菩薩摩訶薩修行菩提又問文殊師
利菩薩云何修行菩提文殊師利言善男子

菩薩摩訶薩無生無滅非無生滅行畢竟滅
無有餘生無所言說菩薩如是修行菩提復
次那羅延菩薩知過去心已滅無所能行未
來心未至無所能行現在心不住無所能行
不著去來現在之心菩薩摩訶薩能如是行
名修行菩提復次那羅延菩薩若知施及菩
提衆生如來等無二行持戒菩提衆生如來
等無二行忍辱菩提衆生如來等無二行精
進菩提衆生如來等無二行禪定菩提衆生
如來等無二行智慧菩提衆生如來等無二

行菩薩如是行六波羅蜜則不壞敗行之性
相菩薩如是修行菩提復次那羅延菩薩觀
色空無有行如觀色空觀受想行識空無有
行色空無盡色畢竟盡以其空故受想行識
識空無盡識畢竟盡以其空故如是性盡一
切法盡色無盡受想行識無盡若有菩薩如
是行者是名爲修菩提之行復次那羅延菩
薩勤斷凡夫法行不生佛法行不出生死行
不滿涅槃行不見一切不善法成不集善法
不異處觀如是解知不壞行性是菩提行那

羅延菩薩如是行是名為修菩提之行復次
那羅延菩薩摩訶薩解衆生界無量法界無
量衆生界法界無盡滅行何以故衆生界法
界無有二故無有二作無有二相不增不減
法界不增衆生界不減衆生界如法界相衆
生界相亦復如是又菩薩解知諸法無相不
盡法界行不盡衆生界行不盡法界行不增
法界行不盡衆生界行不增衆生界行亦不
住餘妄想顛倒所起結使如是正觀善知諸
行不壞諸有行不壞我衆生壽命行那羅延

菩薩如是行名修菩提行文殊師利法王子
演說如是諸行法時十六天子先向大乘今
者逮得無生法忍爾時淨威力士欲為供養
守護是經便作是言世尊若有衆生信解是
經當得一切諸善吉利爾時離魔菩薩語文
殊師利我亦欲說菩薩所行文殊師利言善
男子今正是時汝可演說離魔菩薩言文殊
師利行一切法行是菩薩行行一切魔行是
菩薩行行一切衆生行是菩薩行若行學行
無學行是菩薩行行緣覺行是菩薩行何以

故菩薩摩訶薩應徧學故爾時那羅延菩薩
問離魔天子云何菩薩學行一切諸衆生行
天子答言那羅延菩薩應學八萬四千行何
等八萬四千行謂二萬一千是貪欲行二萬
一千是瞋恚行二萬一千是愚癡行二萬一
千是等分行菩薩悉應入是諸行行於貪欲
斷離貪欲行於瞋恚斷離瞋恚行於愚癡斷
離愚癡行於等分斷離等分行菩薩行一切
衆生行不染衆生行現行一切諸衆生行爲
化衆生故是名菩薩行菩提行那羅延言天

子云何一切魔行是菩薩行天子言一切魔
行入菩薩心菩薩應學隨所起魔業而不隨
之不爲魔行之所繫縛入一切行而修行之
應示魔天令不得便當教化魔離於魔業那
羅延言天子云何學聲聞緣覺行是菩薩行
天子言善男子如是一切行是實性行是無
報行是無住行是無趣行是無生行解知自
行菩薩應當如是修行離魔天子如是說已
語文殊師利法王子善男子汝今復說如是
之行文殊師利言天子菩薩所行過諸境界

何以故此行非是眼境界數亦非色聲香味
觸法境界之數天子是故當知是善丈夫所
行諸行過諸境界復次天子若菩薩摩訶薩
如是修行則是諸佛之所許可無有過咎若
如是行是名菩薩修行正行天子言文殊師
利菩薩云何修行諸佛所許可行文殊師利
言天子一切諸法實際自空如來如是而覺
知之若菩薩住如是法行佛所許可若乃至
涅槃生見著行則誑諸佛天子一切諸法實
際無相如來世尊如是覺知若有菩薩為諸

法作相與相俱住則誑諸佛一切諸法實際
無願如來世尊如是覺知無行無實無生無
起無所有無形無相亦非無相無來無去無
住本性清淨本性明了其性常滅一切諸法
猶如虛空如來世尊如是覺知若是菩薩於
諸法性若有少得則誑如來應正徧覺天子
若是菩薩共空俱住生於見著若是菩薩共
無相俱住生於見著若是菩薩共無願俱住
生於見著則誑諸佛若是菩薩出過三界知
一切法無實無生無起無有無形無相無來

無去無住本性清淨本性照明本性常滅同
如虛空本性無垢若如是知是名菩薩不誑
諸佛爾時世尊讚文殊師利善哉善哉文殊
師利快說此語若是菩薩如是修行名菩提
行疾得受記文殊師利我昔過去於然燈佛
前所住諸行都不得記何以故我有相行有
所依行有所著行我於是後見然燈佛得過
諸行當初見時離諸行見知一切法自性不
生時然燈佛授我記言汝於是後當得作佛
號釋迦牟尼如來應正徧覺我於是時得無

生忍是故文殊師利若有菩薩欲速疾得無
生法忍於是品中應如是修行不著諸法爾
時文殊師利白佛言世尊菩薩摩訶薩為緣
何法得無生忍佛言文殊師利緣陰界入得
無生忍彼得一切諸法之忍亦復緣於常樂
我淨彼得法忍化十文殊師利所言忍六者名緣一
切諸法無盡所言忍者名之為正文殊師利
忍之所緣非與世法而共俱行非凡夫法非
學法非無學法非緣覺法非菩薩法非佛法
而共俱行不與一切諸法俱行名為得忍捨

於一切諸法相著名之爲忍是忍亦不在於
眼色耳聲鼻香舌味身觸意法數中無盡不
盡名之爲忍是忍亦復不離是界是名爲忍
說是忍時有五百菩薩本先佛所種諸善根
得無生忍作如是言此集一切福德三昧能
令我等住於所住亦令我等滿無量法世尊
菩薩摩訶薩應至心聽甚深諸法應當修習
爾時那羅延菩薩問文殊師利云何菩薩於
是深法所作已辦文殊師利言若有菩薩知
一切法無作無不作是名菩薩所作已辦若

知一切諸法無行作已不執不作無忘是名
菩薩所作已辦若是菩薩隨所作無思是名
知恩有爲無爲不生高下不得作者亦有所
作謂作布施住於迴向亦不得施不得菩提
不得自他是名菩薩所作已辦守護淨戒迴
向菩提亦不得戒修行忍進禪定智慧亦不
得慧是名菩薩所作已辦若不得身口意善
業知是菩薩所作已辦若不得身不得口意
所集莊嚴知是菩薩所作已辦爾時常精進
菩薩語文殊師利我亦欲說菩薩摩訶薩所

作已辦文殊師利言善男子今正是時汝便可說常精進菩薩語文殊師利言若菩薩能令一衆生入佛法中如是菩薩所作已辦若有菩薩受衆生食若施與他不以畏故皆悉攝在無上菩提是名菩薩福田清淨若彼施者及與受者如法而作是名菩薩二俱清淨若是菩薩以佛音聲令他得聞自在施戒忍進禪慧作正憶念於大衆中說六波羅蜜令他得聞憶念受持如此善根知是菩薩所作已辦能消供養若是菩薩修行忍辱若爲怨

賊旃陀羅等之所罵辱不瞋不惱爲是衆生今生信喜勤修精進住精進力知是菩薩所作已辦若是菩薩以真金寶滿四天下不貪是寶而作妄語若他問法不相朋黨說言非法知是菩薩所作已辦若有菩薩七日絕食若有人來作如是言汝若能捨捨菩提之心及諸衆生當與汝食而是菩薩終不爲之知是菩薩所作已辦復次文殊師利若是菩薩見滿世界利刀猛火當從中過而往聽法不愛身命作如是學念陰入界易得佛難可遇法

難得聞敬法衆生甚亦難得作是念已入衆
聽法知是菩薩所作已辦復次文殊師利若
是菩薩從他人聞一四句偈若戒若施心生
歡喜勝得轉輪位天王位若以此偈令一人
聞勝得帝釋及梵王處知是菩薩所作已辦
復次文殊師利若是菩薩能住衆中在多聞
中生大喜悅以此多聞向一切智不以得滿
三千大千世界珍寶生大歡喜以自善根爲
一衆生迴向佛道用爲欣慶知是菩薩所作
已辦復次文殊師利菩薩爲化諸衆生故應

勤精進堅自莊嚴修習多聞捨身支節於世
八法其心無異若是菩薩爲佛慧故寧捨身
命不捨持戒菩薩應當作於忍辱能忍諸惡
不善音聲菩薩應當勤加精進莊嚴佛土菩
薩應當獨一寂處爲不敗失菩提道故菩薩
應當不失正念爲修習六波羅蜜故菩薩應
當無所執著勤進戒滿已作善業不捨一切
諸衆生故菩薩應當堅誓莊嚴爲佛法種故
菩薩應當離諸諂僞身口意法善質直故菩
薩應當白淨志欲爲救歸依諸衆生故菩薩

應當無所觀作不著身命故菩薩應當甘軟
好語善來問訊故菩薩應當常先意語無有
瞋憤不言說故菩薩應當猶若如地無愛憎
故菩薩應當柔和善軟同止歡樂故菩薩應
當善易教誨速受教故菩薩應當除捨憍慢
謙下一切諸衆生故菩薩應當猶之如狗不
誑一切衆生不違本誓故菩薩應當諸衆生
中起大慈心一切空故菩薩應當諸衆生中
起大悲心爲諸衆生作大利故菩薩應當生
於大喜欣樂修習諸善根故菩薩應當修行

大捨不觀一切五欲樂故菩薩應當不慳貪
惜自捨身故菩薩應當不著我所不貪一切
諸財物故菩薩應當修大捨心捨一切妄想
故菩薩應當具滿大財聖七財故菩薩應當
牢堅志固一切善根故菩薩應當無有滿足
修習無量佛功德故菩薩應當智慧勇健摧
四魔故菩薩應當作大醫王善治一切煩惱
病故菩薩應當爲作應供不捨菩提心故菩
薩應當作於福田爲諸衆生作光明故菩薩
應當猶如蓮華不爲世泥所汙染故菩薩應

當猶如船棧度諸衆生故菩薩應當猶之如
橋於上中下一切衆生無別想故菩薩應當
猶如大池專意正法永無盡故菩薩應當猶
如大海一向多聞無厭足故菩薩應當猶如
大山無能動故菩薩應當善安止住如門閫
故菩薩應當無所染著一切所有諸財物故
菩薩應當令心自在不退轉故菩薩應當猶
如大王爲尊勝故菩薩應當猶如帝釋一切
衆生所尊貴故菩薩應當猶如梵王自在法
王故菩薩應當安樂一切諸衆生等究竟安

樂至涅槃故菩薩應當爲作父母與諸衆生
衣服利故菩薩應當無所傷損一切善不善
法故菩薩應當無所侵害親非親中心平等
故菩薩應當不親不信所生諸入故菩薩應
當爲法施主一切悉捨故菩薩應當離於一
切放逸懈怠爲集菩提故文殊師利菩薩常
應牢強精進修習一切諸戒德行為得無上
正真道故爾時世尊讚常精進菩薩摩訶薩
善哉善哉善男子善說諸行所應住想善男
子若菩薩摩訶薩欲逮得此集一切福德三

昧者應當勤修一切福德不應捨離一切福德爾時那羅延菩薩白言世尊若有得此集一切福德三昧者不墮惡道不生八難斷諸貧窮心常自在諸根具足以三十二大丈夫相善自莊嚴得大辯才及無盡法得陀羅尼得不忘念起一切福轉法輪故得灌頂位釋梵護世一切衆生所供養故得具諸通通達一切死此生彼故得大自在自在所生諸所入故得大封邑增長諸法故得智光明離惡邪見故得大稱讚一切聲聞緣覺地故得大

調伏一切聲聞緣覺人故善分別諸根教化衆生故神通自在諸禪解脫三昧門故得無作施解知施故得無住戒三戒淨故有無量忍慈心普徧諸衆生故修行精進心無疲倦故得禪波羅蜜解知寂靜爲化衆生生欲界故淨慧莊嚴善觀音聲故是名淨眼能見道化十故不離見佛及與聞法不離於空無相無作能持一切佛所有法不離覩見得不退轉菩薩之僧去無障礙一切佛土諸功德故降伏諸魔勝四魔故得深法忍不退轉法故疾能

通達滿足佛法所未聞法自來入耳欲願具足取一切佛土諸功德故彼得安隱離諸習故得自在身普徧三界而示現故一切外道不能降伏善守護法於諸佛所捨失身命守護正法故見佛境界而不畢竟入涅槃故得無所畏在衆無畏故有所爲作以智爲首心無所營故現大莊嚴神通變化故得大勢力過諸害故淨音聲揚徧聞一切諸世界故心大勇健摧伏一切諸魔軍故到神通彼岸能動一切佛世界故得大辯才法辭及義無滯

礙故知解無礙而無放逸住作佛事示諸衆生一切智故佛告那羅延若菩薩入是集一切福德三昧得於如是相貌事像無量功德爾時那羅延菩薩白佛言世尊願諸衆生得集一切福德三昧如此菩薩得是三昧所有功德令諸衆生得是功德一切聲聞及諸緣覺之所無有世尊若有菩薩不得聞於是三昧寶雖聞不解當知是人爲魔所持佛言那羅延如是如是如汝所說若有菩薩聞是三昧所生功德若已生若今生若當生無量無

邊爾時那羅延菩薩問文殊師利若有菩薩
欲修習行是三昧者當行何法文殊師利言
菩薩欲得是三昧者不捨凡夫法為持佛法
如是修行不與法相應不與非法相應如是
修行雖流轉生死不學生死法不為生死所
染雖學涅槃不入聲聞緣覺涅槃復次那羅
延若有菩薩欲學此三昧應益增長集一切
福德不於有漏無漏諸功德中生起妄想若
善不善有為無為世間出世間若罪若福起
於分別於一切福德皆入法性若福法行若

化十

十二

罪法行若無記法行皆入法性應如是見諸
衆生福等不實起是衆生福佛福悉皆同等
不見差別法界無異起無差別若凡夫福學
福無學福緣覺福菩薩福正覺福皆悉不實
無有物故無有方處無非方處應如是知應
解福性衆生同等善男子如一切色皆依四
大菩薩之福亦復如是徧一切處終不起於
福德狂逸應知無常盡滅之法那羅延若菩
薩欲得此三昧者於四法中而不驚畏何等
四於諸衆生大悲無邊佛剎無邊佛智無邊

入一切衆生心行無邊那羅延菩薩於此四
 無邊中不應生畏又復菩薩應當解知四不
 思議何等四業及業報不可思議一切衆生
 種種諸行若干差別不可思議佛如來行不
 可思議菩薩生起諸清淨行不可思議那羅
 延是名為四不可思議北十應當解知善男子菩
 薩解知得四無盡何等四福德無盡滿普無
 盡樂說無盡究竟智無盡那羅延是為菩薩
 得四無盡那羅延菩薩應當修行四法何等
 四莊嚴善根無有滿足方便迴向一切無盡

無有滿足一切佛土諸莊嚴事取以莊嚴自
 己佛土無有滿足梵本中法那羅延菩薩應當
 如是修習行是四法爾時那羅延菩薩復問
 文殊師利此集一切福德三昧經當至何等
 菩薩之手若是經卷若至舍宅若禪若忍若
 在家若出家文殊師利言那羅延若菩薩摩
 訶薩聞是三昧若至於耳若至其手若至舍
 宅彼人若當不起誹謗如是之人我不名之
 為在家者當名是人為出家者何以故由是
 菩薩勤修分別是三昧故彼人當能除一切

想存在住處一切福德及與智慧無盡無散
那羅延菩薩為化諸眾生故示現種種形色
相貌那羅延是人徧至一切諸處猶如日月
照四天下一切悉現如是那羅延菩薩亦爾
不依諸難雖在家中而不依家亦非出家不
依沙門法二俱叵說何以故菩薩不依一切
所有及諸入故那羅延如琉璃寶器隨所在
處不失其性如是那羅延若有菩薩住是三
昧雖復在家當說是人名為出家能不失是
法界體性爾時那羅延問文殊師利菩薩摩

訶薩住在何處而能不失是集一切福德三
昧得於如是無盡福德智慧莊嚴文殊師利
言菩薩摩訶薩有四住處何等四所謂菩薩
不住身命及諸利養尊重讚歎住空無相無
願三昧不住聲聞緣覺正位希望佛智及無
礙辯而無貢高妄想分別亦不執著如是住
處是菩薩位解脫一切所有眾生不住我人
眾生壽命及與丈夫那羅延是為菩薩四所
住處最勝住處莊嚴無盡大福德聚莊嚴無
盡大智慧聚斷一切見成就具足起諸佛法

凡十

十四

那羅延言文殊師利菩薩云何得是住處得名出家文殊師利言那羅延菩薩有四法得是住處謂住慈住悲住喜住捨那羅延是爲菩薩住四住處那羅延菩薩若住村邑聚落若住空處若住是四梵行住處名正住處若離是四梵行住處雖於殿堂樓閣中住不名住處那羅延是人名爲欺誑一切人天阿脩羅虛食供養那羅延菩薩若住餘諸梵行皆攝在此四梵行中何以故那羅延是梵行住處甚難得故若有不見是四梵行緣聖禪者

是世身見不斷於慢那羅延言文殊師利云何菩薩得名住此慈悲喜捨文殊師利言那羅延若有菩薩作如是念我要當度一切衆生是名住慈我要當救一切衆生是名住悲我要當令一切衆生得住佛法是名住喜我要當以出世間法寂靜一切諸衆生等是名住捨復次那羅延菩薩若解諸法界空是名住慈菩薩若解諸法界寂是名住悲菩薩若解一切法界無著無縛無解是名住喜菩薩若解一切法界無去無來是名住捨那羅延

化十

十五

是名菩薩住慈悲喜捨復次那羅延菩薩若見無我之法而不驚畏是名住慈若見一切衆生寂滅而不驚畏是名住悲若聞一切佛法同等如一佛法而不驚畏是名住喜若聞一切利無盡而不驚畏是名住捨復次那羅延無所滯礙是名爲慈救衆生苦是名爲悲悉無所惱是名爲喜不高不下是名爲捨復次那羅延有慈悲非大慈大悲大悲聲聞緣覺之所無有聲聞緣覺所有慈悲不能安樂一切衆生是名慈悲非大慈大悲云何

名爲大慈大悲若於一切諸衆生等起平等心脫其苦惱是名菩薩大慈大悲若生五道爲諸衆生自捨已樂作如是念是諸衆生墮在邪道我當安止令住正道是名菩薩大慈大悲那羅延是故當知聲聞緣覺有慈有悲無大慈大悲那羅延是故菩薩應當修滿大慈大悲說是大慈大悲法時八千衆生發阿耨多羅三藐三菩提心作如是言我等亦當住如文殊師利所說大慈大悲八千菩薩得集一切福德三昧八千衆生遠離塵垢得法

眼淨爾時那羅延菩薩白言世尊如來世尊
名百福相以何因緣得如是相佛告那羅延
若於十方各如恒河沙等世界所有衆生皆
成轉輪大王所有功德福聚等一帝釋所有
福德十方恒河沙等世界所有衆生成就福
聚北十皆如帝釋是諸帝釋所有福聚等一梵王
所有福聚那羅延若恒河沙等世界所有一
切衆生成就福聚皆如梵王是諸梵王所有
福聚等一聲聞所有福聚那羅延若恒河沙
等世界所有一切衆生皆成聲聞是諸聲聞

所有福聚等一緣覺所有福聚那羅延恒河
沙等世界所有一切衆生皆悉成就緣覺福
聚那羅延是諸一切聲聞緣覺所有福聚盡
合爲一菩薩成就集一切福德三昧有如
是福所有福聚復過於是那羅延是菩薩所
成福德善根無量無邊那羅延若使十方如
恒河沙等世界所有一切衆生皆悉逮得是
集一切福德三昧福德之聚是諸福聚復百
千倍猶不等佛一相福德是名如來百福德
相一切衆生無能思量是故如來名不思議

百福德相說是百福德相法時而此三千大千世界六種震動大光普照百千妓樂不鼓自鳴天雨妙華一切世間諸天世人阿脩羅等歎未曾有大聲唱善五體投地禮世尊足作如是言若有衆生發於無是正真道心快得化下善利當得如是百福德相莊嚴之身勝諸一切釋梵護世聲聞緣覺所有福聚其有衆生得聞此集一切福德三昧寶者得大利益既得聞已當如說行世尊所在國土有是經處當知是中善男子善女人佛力所持能流

通此經世尊若使滿於世界大火當從中過往聽是經佛言如是如是善男子如汝所言若有善男子善女人不聞是經當知是人爲魔所持善男子若菩薩聞此三昧經不能受持我不說彼名爲得聞若聞不持不讀不誦不轉不於大衆廣分別說不名多聞爾時大衆皆共同聲白佛言世尊願護是經名集一切福德三昧令廣流布爾時世尊放於白毫藏相光明徧照無量無邊世界是光明中出如是音聲如來應供正徧覺已護是經爾時

佛告大德阿難阿難如來不久當般涅槃却後三月入無餘涅槃阿難我今以此三昧經典付囑於汝受持讀誦廣分別說阿難若有衆生持是經者則於其人佛不涅槃法亦不滅何以故阿難若有開示是經典者當知是人則爲見佛若大衆中分別演說顯示文義當知是人守護正法爾時阿難悲泣流淚白佛言世尊願住一劫若住百劫若住千劫多所安隱多所饒益利安人天佛告阿難汝勿悲泣汝若受持是經讀誦令廣流布使不漏

失隨爾所時常爲見佛何以故佛如來者都不可色身所見不可以三十二相見不可以諸好而見阿難若有得見如是等經則爲見佛說是經已文殊師利法王子那羅延菩薩淨威士士及大菩薩僧大德阿難等聲聞大衆一切人天諸龍夜叉乾闥婆阿脩羅世間人民聞佛所說皆大歡喜

集一切福德三昧經卷下

音釋

咎

巨九切
愆也

憤

房吻切
世也

棧

房越切
桴棧也

永樂北藏

集一切福德三昧經

第三六册